

ACTA DA SESIÓN ORDINARIA, CELEBRADA POLO PLENO DO CONCELLO O DÍA 12 DE NOVEMBRO DE 2007.

ASISTENTES:

ALCALDE-PRESIDENTE:

D. José Demetrio Salgueiro Rapa

CONCELLEIROS:

D. José M. Balseiro Canoura

D^a. Ana Maria Abad López

D. José Manuel González Álvarez

D^a. M^a Dolores Meitín Guerreiro

D. Modesto Ben Fernández

D. Xesús Xosé Fernández Bouza
(incorporouse sendo as 19,10 horas)

D. Jaime Pernas Rodríguez

D. Secundino Vázquez Fra

D. Javier Fernández Basanta

D. Jesús Casabella Lage

INTERVENTORA:

D^a Elena Santos Rey

Na Casa Consistorial do Concello de Xove, sendo as dezanove horas do día 12 de novembro de dous mil sete, baixo a presidencia do Sr. Alcalde - Presidente, D. José Demetrio Salgueiro Rapa, e coa asistencia dos señores Concelleiros á marxe relacionados e do Secretario D. Luís María Fernández del Olmo, procedeuse a celebra-la sesión ordinaria convocada para a hora e día da data.

Sendo a hora sinalada, polo Sr. Alcalde - Presidente, declarouse aberta a sesión, procedéndose ó debate e votación dos asuntos incluídos na orde do día.

1º) APROBACIÓN DA ACTA DA SESIÓN PLENARIA ANTERIOR DE 10 DE SETEMBRO DE 2007.- ADOPCIÓN DE ACORDO.

Seguidamente, polo Sr. Alcalde - Presidente, preguntouse ós asistentes se tiñan algunha obxección que formular o borrador da acta plenaria de 10 de setembro de 2007.

Non habendo obxeccións, o Concello Pleno por unanimidade dos seus membros acorda aproba-lo borrador da acta da sesión plenaria de data 10 de setembro de 2007.

Neste momento, sendo as 19,10 horas, incorpórase á sesión o Sr. D. Xesús Xosé Fernández Bouza.

2º) TOMA DE POSESIÓN DE D. XESUS XOSÉ FERNÁNDEZ BOUZA DO SEU CARGO DE CONCELLEIRO POLO BLOQUE NACIONALISTA GALEGO.

Por Secretaría dáse conta á corporación que obra no expediente a credencial de concelleiro, emitida pola Junta Electoral Central, designando a D. Xesús Xosé Fernández Bouza, Concelleiro do Concello de Xove, por estar incluído na lista de candidatos presentada polo Bloque Nacionalista Galego ás eleccións locais de 27 de maio de 2007, en substitución por renuncia de D. Xosé Durán Cao.

Igualmente, polo Secretario Municipal ponse no coñecemento da Corporación que D. Xesús Xosé Fernández Bouza ten presentada na Secretaría Municipal para a súa incorporación ó rexistro de intereses, as declaracións as que se refire o Art. 75 da Lei 7/1985 de 2 de abril, modificada polo Art. 42 da Lei 14/2000 de 29 de decembro.

A seguir, polo Sr. Fernández Bouza, ós efectos do disposto no Art. 108 da Lei Orgánica 5/1985, e consonte á formula establecida polo R. D. 107/1979 de 5 de abril, promete pola súa conciencia e honra, cumprir fielmente as obrigas do cargo de Concelleiro, con lealdade ó Rei, e gardar e facer gardar a Constitución como norma fundamental do Estado, tomando en consecuencia posesión do seu cargo de Concelleiro.

Polo Sr. Alcalde dáse a benvinda ó Sr. Fernández Bouza como novo membro da Corporación Municipal.

3º) EXPEDIENTE DE MODIFICACIÓN DA ORDENANZA FISCAL MUNICIPAL REGULAMENTADORA DA TAXA POLA EXPEDICIÓN DE DOCUMENTOS. APROBACIÓN INICIAL. ADOPCIÓN DE ACORDO.

Por Secretaría dáse lectura ó ditame emitido pola Comisión Informativa de Contas, na súa sesión de data 8/11/2007, que a seguir se transcribe integramente:

“Por Secretaría dáse conta á Comisión do expediente do epígrafe.

Polo Sr. Alcalde e maila Interventora Municipal explicase o contido da proposta que se somete ó coñecemento e ditame da Comisión.

Polo Sr. Alcalde manifestase que o motivo que xustifica a súa proposta de modificación basease dunha banda, no feito de que o Punto de Información Catastral de Xove está practicamente colapsado, debido a que é o único PIC da Mariña no que a expedición de certificacións catastrais é gratuíta, o que está a provocar a presentación de solicitudes por parte de veciños dos concellos limítrofes, interesando certificacións sobre inmobles que nen tan sequera están ubicados en Xove, e doutra banda, deixando a un lado o feito de que os funcionarios responsables do PIC, nalgunhas xornadas laborais non poden atender as outras labouras que teñen encomendadas, o coste económico (cada toner de color para á impresora ten un prezo de 90€) para o Concello empeza a ser significativo, xa que na maioría dos casos, as certificacións catastrais que se solicitan e expiden, inclúen documentación gráfica das fincas.

Remata a súa intervención o Sr. Alcalde, que en calquera caso a taxa que se propón, é con diferenza a mais baixa de tódalas existentes nos outros Concellos da Mariña.

Enterada a Comisión, cos votos favorables dos Sres. Salgueiro Rapa, González Alvarez e Meitín Guerreiro e a abstención dos Srs. Vázquez Fra, e Ben Fernández, acorda :

1º) Informar favorablemente a aprobación inicial polo Concello Pleno do expediente de modificación da ordenanza fiscal municipal regulamentadora da taxa pola expedición de documentos proposta polo Sr. Alcalde.”

Aberto o debate, polo Sr. Pernas Rodríguez manifestase que Xove é un Concello distinto os demais, pola súa capacidade económica e sempre se procurou que dentro do posible, os servizos municipais resultaran gratuítos ou moito mais económicos para os veciños que no resto dos Concellos.

Engade o Sr. Pernas Rodríguez que o Punto de Información Catastral é un servizo que trouxo o equipo de goberno anterior con moito esforzo, por entender que era de gran utilidade para tódolos veciños, xa que se evitaban desprazamentos a Lugo e considerables retrasos e perdas de tempo na obtención de certificacións catastrais dos seus bens.

Remata o Sr. Pernas Rodríguez sinalando que non lle parece xustificade cobrar pola obtención de ditos certificados catastrais, agás que se trate de certificacións sobre bens inmobles que non estean ubicados no Termino Municipal de Xove, para evitar o colapso do PIC de Xove e para reducir substancialmente os gastos de prestación do Servizo.

Polo Sr. Fernández Bouza manifestase que á vista da capacidade económica do Concello de Xove, non parece que a prestación do servizo do PIC poida ser considerado unha carga económica demasiado importante para o Concello.

Polo Sr. Ben Fernández manifestase que a taxa que se propón non deixa de ser un imposto mais para os veciños de Xove, coa que non está de acordo.

Polo Sr. Alcalde manifestase que a súa proposta non ten unha finalidade recaudatoria, senón que o obxectivo principal da mesma é evitar o uso abusivo que se está a facer do PIC de Xove debido a que é o único Concello en que dito servizo é gratuío.

Polo Sr. Alcalde proponse ós membros da Corporación deixar sobre a mesa este asunto, á espera de que polo Servizo de Xestión Catastral se comunique o Concello de Xove, previa consulta, si é posible que o PIC de Xove soamente teña obriga de expedir certificacións catastrais respecto dos bens inmoables, tanto de natureza rústica como urbana que estean ubicados no termo municipal de Xove.

Enterada, a Corporación por unanimidade dos seus membros asistentes á sesión e o abeiro do Art. 92.1 do Real Decreto 2568/1986, acorda deixar sobre a mesa o asunto para mellor estudio, á espera da resposta que sexa remitida polo Centro de Xestión Catastral.

4º) PROPOSTA DE ALCALDÍA SOBRE APROBACION DO REGULAMENTO DO SERVIZO MUNICIPAL DE ABASTECIMIENTO DE AUGA POTABLE. APROBACION INICIAL. ADOPCION DE ACORDO.

Por Secretaría dáse conta á Corporación do Regulamento do epígrafe.

Aberto o debate, polo Sr. Pernas Rodríguez manifestase que unha vez mais, o Grupo de Goberno trae ó debate e aprobación do pleno corporativo un asunto de enorme importancia e complexidade, sen contar para nada cos grupos da oposición.

Engade o Sr. Pernas Rodríguez que coa celebración dunha xuntanza previa, se podería ter feito un regulamento moito mellor xa que o que se presenta polo Sr. Alcalde ten unha gran cantidade de erros e incluso de ilegalidades.

Polo Sr. Fernández Bouza manifestase que o regulamento do Servizo de Abastecemento de Auga Potable é unha necesidade imperiosa, engadindo que o regulamento que se trae ó coñecemento do Pleno dá a impresión de se-lo regulamento tipo que están a utilizar na maioría dos Concellos.

Polo Sr. Ben Fernández sinalase que este tipo de asuntos deben de ser consensuados entre todos os grupos antes de vir o pleno.

Rematado o debate, votan a favor os Sres. Salgueiro Rapa, Balseiro Canoura, González Alvarez, Abad López, e Meitin Guerreiro, votando en contra da aprobación os Sres. Pernas Rodríguez, Vázquez Frá, Fernández Basanta, Casabella Lage, e Ben Fernández. O Sr. Fernández Bouza abstense.

Visto o resultando de empate da votación, e consonte o disposto no Art. 46.2.d. “in fine” da Lei 7/1985 de 2 de abril, efectúase unha nova votación co resultado que a seguir se transcribe:

Votan a favor os Sres. Salgueiro Rapa, Balseiro Canoura, González Alvarez, Abad López, e Meitin Guerreiro, votando en contra da aprobación os Sres. Pernas Rodríguez, Vázquez Frá, Fernández Basanta, Casabella Lage, e Ben Fernández. O Sr. Fernández Bouza abstense.

Como queira que o empate persiste, consonte ó disposto no artigo anteriormente citado, decide o voto de calidade do presidente, Sr. Salgueiro Rapa, e na súa consecuencia considérase aprobado inicialmente o regulamento do epígrafe que a seguir se transcribe integramente, e que deberá ser sometido ó preceptivo tramite de información pública por prazo de 30 días hábiles ós efectos da

presentación de alegacións ou reclamacións mediante anuncio a publicar no Boletín Oficial da Provincia de Lugo.

“REGULAMENTO DO SERVIZO MUNICIPAL DE ABASTECIMENTO DE AUGA POTABLE

En virtude das facultades conferidas polos artigos 4.1a) e 49 da Lei 7/85, de 2 de abril, Reguladora das Bases de Réxime Local, o Concello Xove, dicta o presente Regulamento regulador da prestación do servizo de abastecemento de auga dentro do termo municipal ó que, con carácter supletorio, serán de aplicación os preceptos do Regulamento de Servizos das Corporacións Locais e o Real Decreto 314/2006, de 17 de marzo, polo que se aproba o Código Técnico da Edificación.

CAPITULO I: OBXECTO E ÁMBITO DE APLICACIÓN

Artigo 1.- Obxecto do Regulamento e ámbito de competencia

1. O obxecto do presente Regulamento é a regulación do servizo municipal de abastecemento de auga dentro do termo municipal do Concello de Xove. As normas contidas no mesmo serán de obrigado cumprimento e de aplicación na totalidade do dito termo municipal.

2. O abastecemento de auga potable é un servizo de titularidade municipal e o Concello de Xove presta o dito servizo de xeito directo con persoal do propio Concello aínda que poderá prestalo de calquera das formas previstas na normativa de aplicación.

3. As instalacións do servizo son bens de dominio público municipal na súa modalidade de bens de servizo público.

Artigo 2.- Terminoloxía

1. Ós efectos de simplificación no sucesivo, á entidade xestora do servizo denominaráselle "Concello", designándose "aboadado" a aquela persoa física ou xurídica que sexa titular do dereito de uso da finca, local ou industria, ou o seu representante, que teña contratada a subministración de auga potable. Denominarase "usuario" calquera persoa consumidora do servizo de abastecemento de auga.

2. Denominarase igualmente co termo xenérico de "servizo" ó servizo de subministración de auga potable.

CAPITULO II: OBRIGAS E DEREITOS DO CONCELLO E DOS ABOADOS

Artigo 3.- Obrigas do Concello

1. Con independencia daquelas situacións que sexan obxecto dunha regulación especial neste mesmo Regulamento e das que poden derivarse obrigas específicas para o Concello, esta terá as seguintes obrigas:

-Distribuír e situar nos puntos de toma dos aboados a auga potable, con arreglo ás condicións que se fixan neste Regulamento e demais disposicións que sexan de aplicación, con mención especial ás sanitarias, así como manter a continuidade da subministración, salvo supostos de interrupcións indicados neste Regulamento.

-Conceder a subministración de auga dentro da área de cobertura a todo petionario do mesmo e a ampliación da mesma correspondente a todo aboadado final que o solicite, nos termos establecidos no presente Regulamento e nas condicións técnicas e económicas recollidas na normativa vixente.

-Garanti-la potabilidade da auga, con arreglo ás disposicións sanitarias vixentes, ata a chave do aboado, inicio da instalación interior do aboado ou aboados.

-Manter e conservar as redes e instalacións necesarias para o abastecemento

-Mante-la chave de rexistro nas condicións de presión e caudal establecidas na autorización da subministración, salvo casos de averías accidentais ou forza maior.

-Aplicar ós distintos tipos de subministración que teñan establecidas, as tarifas que en cada momento estean aprobadas.

-Mante-la regularidade na subministración de auga, a salvo dos supostos de interrupción previstos neste Regulamento, e informar ós aboados sempre que sexa posible das interrupcións ou alteracións que se podan producir como resultado das súas actuacións ou de terceiros, salvo casos de forza maior. Exclúense as interrupcións forzadas por causas fortuítas e imprevistas, como roturas accidentais por actuacións externas ou por fallos na rede.

-Dispor dun servizo permanente de recepción de avisos e averías e para informacións urxentes e aqueloutras anomalías que podan producirse relacionadas coa prestación do servizo. O Concello deberá realiza-las reparacións de avarías producidas por particulares na vía pública, sendo a cargo do causante da avaría o abono do importe de ditos traballos.

Artigo 4.- Dereitos do Concello

1. Sen perxuício daqueles outros que en relación con situacións específicas podan derivarse para o Concello, este, con carácter xeral, terá os seguintes dereitos:

-Inspeccionar, coas limitacións que se establezan neste Regulamento, as instalacións interiores da subministración que por calquera causa se atopen ou podan atoparse en servizo ou uso. A tal efecto, se a xuízo do Concello se determinara que existe perigo grave para a seguridade das persoas polo mal estado das instalacións ou ameaza de danos graves, poderase suspender o servizo de forma inmediata, poñendo o feito en coñecemento do interesado. Neste caso, coma naqueles outros nos que exista a necesidade de acometer a reparación por urxencia, o Concello poderá repercutir ó aboado os gastos nos que se incorrese debidamente xustificadas. Os aboados serán responsables dos danos e prexuízos que as deficiencias das súas instalacións podan causar a terceiros.

-Percibir, nas súa oficinas ou lugares destinados ao efecto o importe das facturacións ou cargos que regulamentariamente formule ao aboado.

Artigo 5.- Obrigas do aboado

1. Con independencia daquelas situacións que sexan obxecto dunha regulación especial neste mesmo Regulamento, das que podan derivarse obrigas específicas para un aboado, estes terán, con carácter xeral, as obrigas seguintes:

-En reciprocidade ás prestacións que recibe, virá obrigado ó pagamento dos cargos que se formulen con arreglo ás tarifas vixentes en cada momento así como aqueles outros derivados dos servizos específicos prestados previa información dos mesmos ós aboados ou usuarios. En canto ós consumos de auga se refire, esta obrigatoriedade de pago considerarase extensiva ós casos de fuga, avería ou defecto de construción ou conservación das instalacións interiores.

-O aboado virá obrigado a usar a auga subministrada na forma e usos establecidos na autorización, de conformidade co presente Regulamento.

-Sen perxuício de canto ó efecto establecen as normas básicas para instalacións interiores da subministración de auga todo aboado deberá utilizar de forma correcta as instalacións ó seu

servizo adoptando as medidas necesarias para conservar as mesmas na forma mais adecuada, e evitando o entorno á rede, mantendo ademais intactos os precintos que garantan a non manipulación do contador e instalacións de acometida, no seu caso; así como as condicións idóneas para a tomade lecturas do mesmo.

-Facilitar ó Concello a colocación dos elementos precisos na propiedade obxecto da subministración así como a permitir a entrada a aquela ó persoal autorizado polo mesmo, que así o acredite, a fin de que poda efectuar cantas comprobacións estean relacionadas co subministro.

-Os aboados non poderán, baixo ningún concepto ceder gratuíta ou remuneradamente auga a terceiros, salvo para uso dun servizo público con carácter de emerxencia, xa sexa con carácter permanente ou temporal, sendo responsables de toda defraudación que se produza na subministración, ben por sí ou por calquera outra persoa que del dependa.

-Os aboados deberán, en interés xeral e no seu propio, poñer en coñecemento do Concello calquera avería ou perturbación producida, ou que, a seu xuízo, se puidera producir na rede xeral de distribución. Asimesmo, está obrigado a solicitar do Concello autorización pertinente para calquera modificación nas súas instalacións, que implique un aumento nos caudais contratados de subministración, ou modificación no número dos receptores.

-O aboadado deberá comunicar ó Concello calquera modificación que realice na disposición ou características das súas instalacións interiores, que afecten ás condicións xerais da subministración.

-O aboadado deberá mante-lo contador e a zona de acceso ó mesmo en condicións axeitadas para permiti-la súa comprobación polo persoal do Concello

-O aboadado que desexe causar baixa na subministración por calquera causa, incluso cambio de titularidade, está obrigado a notificar por escrito ó Concello dita baixa, debendo terse en conta o previsto no artigo 25.a), indicando en todo caso, a data na que debe cesar a citada subministración. Sen a dita declaración expresa e os pagos dos recibos pendentes, non se terá en conta nignha modificación.

-Cando nunha mesma finca exista, xunto á auga de distribución pública, auga doutra procedencia, o aboadado virá obrigado a establecer redes e instalacións interiores por onde circulen ou se almacenen independentemente as augas, sen que exista posibilidade de que se mezclen as augas dunha ou outra procedencia.

Artigo 6.- Dereitos do aboadado

1. Sen perxuicio daqueles outros que en relación con situacións específicas podan derivarse para os aboados, estes, con carácter xeral, terán os seguintes dereitos:

-A recibir nas súas instalacións auga que reúna os requisitos de potabilidade establecidos nas disposicións vixentes.

-Á disposición permanente da subministración de auga potable, con arreglo ás condicións que se sinalan na oportuna autorización, sen outras limitacións que as establecidas no presente Regulamento e demais disposicións aplicables.

-A que os servizos que reciba se lle facturen polos conceptos e tarifas vixentes en cada momento.

-A que se lle tome polo Concello a lectura ó equipo de medida que controle o subministro, cun período non superior a dous meses.

-A que se lle formule a liquidación dos servizos que reciba cunha periodicidade máxima de dous meses.

-Os aboados poderán elixir libremente o instalador autorizado que execute as instalacións interiores, así como o proveedor do material que deberá axustarse ás prescricións técnicas regulamentarias esixibles.

-A consultar todas as cuestións derivadas da prestación e funcionamento do servizo en relación á súa subministración así como a formular as reclamacións administrativas que considere convintes.

CAPITULO III. CONDICIÓN DO SERVIZO

Artigo 7.- Instalacións do abastecemento de auga

1. Considérase "rede de distribución" o conxunto de tuberías e todos os seus elementos de maniobra e control que, instalados dentro do ámbito territorial da entidade subministradora e en terreos de carácter público ou privado, previa constitución da oportuna servidume, conducen auga potable a presión, e da que se derivan as acometidas para os aboados.

2. A "arteria" será aquela tubería e os seus elementos da rede de distribución que enlaza diferentes sectores da zoa abastecida sen que nela podan realizarse acometidas.

3. Calificaranse como "conduccións viarias" as tuberías da rede de distribución que discurren ó longo dunha vía pública ou privada, previa constitución da oportuna servidume e das que se derivarán no seu caso as acometidas para as subministracións, bocas de rego e tomas contraincendios.

4. A "acometida" comprende o conxunto de tuberías e outros elementos que unen as conduccións viarias coa instalación interior do inmovible que se pretende abastecer. A acometida constará dos seguintes elementos:

-Dispositivo de toma: atópase colocado sobre a tubería de distribución e abre o paso da acometida.

-Ramal: é o tramo da tubería que une o dispositivo de toma coa chave de rexistro

-Chave de rexistro: está situada ó final do ramal de acometida na vía pública e xunto ó inmovible. Constitúe o elemento diferenciador entre o Concello como entidade subministradora e o aboadado, no que respecta á conservación e delimitación de responsabilidades. Para o caso de que a acometida non dispoña de chave de rexistro, o límite do ramal ubicado no dominio público será o elemento diferenciador no referente á conservación e delimitación de responsabilidades.

5. Entenderase por instalación interior da subministración de auga o conxunto de tuberías e os seus elementos de control, maniobra e seguridade, posteriores á chave de rexistro ou ó límite do ramal ubicado en dominio público no sentido da circulación normal do fluxo da auga. As instalacións interiores para a subministración de auga serán executadas por instalador autorizado e axustaranse a canto ao efecto prescribe a norma básica para instalacións interiores de subministración de auga.

A conservación e mantemento destas instalacións será por conta e cargo do titular da subministración existente en cada momento.

CAPÍTULO IV. ACOMETIDAS

Artigo 8.- Concesión e obxecto da concesión

1. A concesión de acometida para subministración de auga potable corresponde, en todo caso, ó Concello de Xove.

2. As concesións de acometidas ás redes de distribución de auga potable faranse para cada inmovible que físicamente constitúa unha unidade independente de edificación aínda cando estean situados de xeito contiguo e pertencen aos mesmos propietarios.

Artigo 9.- Condicións da concesión

1. A concesión para unha acometida de subministración de auga está supeditada a que se cumpran as condicións de abastecemento pleno, que se establecen seguidamente:

-Que o inmovible a abastecer estea situado na área de cobertura do abastecemento

-Que o inmovible que se pretende abastecer conte con instalacións interiores dispoñibles e adecuadas ás normas do presente regulamento.

-Que o inmovible a abastecer dispoña de acometida para vertido de augas residuais e pluviais de xeito independente ou separado, ou teña resolto o sistema de evacuación das mesmas, dispoñendo neste caso, das autorizacións precisas para iso.

-Que o emprazamento donde se solicita a acometida, cumpra coas condicións urbanísticas que determina a normativa vixente para dispor deste servizo de auga.

Artigo 10.- Actuacións na área de cobertura

1. Cando dentro da área de cobertura, se dean as condicións de abastecemento pleno e se formalizara a correspondente concesión de acometida, o Concello estará obrigado a realizar os traballos e instalacións necesarias para a posta en servizo da acometida ou acometidas solicitadas.

2. A implantación de novas redes e instalacións debido ao proceso urbanizador de novos sectores de solo urbanizable que revirtan ao servizo municipal de augas serán por conta do promotor. Unha vez recepcionadas polo Concello, éste pasará a facerse cargo de xeito automático da súa explotación e conservación.

Artigo 11.- Tramitación de solicitudes.

As solicitudes de acometida faranse polos peticionarios no impreso normalizado que a tal efecto se facilitará. Na solicitude deberán facerse constar as características do subministro e unha vez autorizado deberá facerse efectivo o pago da correspondente taxa de existir esta, podendo neste caso esixirse en réxime de autoliquidación, en función do prescrito pola correspondente Ordenanza Fiscal aprobada ó efecto.

No caso específico de acometida temporal para obras, deberá presentarse a licenza municipal de obras. Este será o único caso de autorización de acometidas provisionais ou temporais, e terán o carácter de acometidas en precario durante o prazo fixado como de execución da obra. En ningún caso se utilizará para vivendas ou locais a auga subministrada para conexións de obra. Ó remate das obras, deberá poñerse tal feito en coñecemento do Concello, solicitándose o abastecemento definitivo, que, unha vez concedido, suporá o cambio de tarifa de obra a tarifa doméstica. No caso de que unha vez rematada a obra non se tivese efectuada esta solicitude, o consumo continuará facturándose coa tarifa de auga de obra.

A notificación da concesión da solicitude de acometida e o pagamento se fose o caso da correspondente taxa constituirá motivo suficiente para incorporar ó solicitante ó correspondente padrón da taxa por subministro de auga no uso que corresponda, e tamén no seu caso, no padrón da taxa pola recollida de lixo.

Artigo 12.- Requisitos das acometidas

A solicitude de acometida á rede municipal non será tramitada se se cumpren as circunstancias seguintes:

- Que o inmovible a abastecer non estea situado dentro da área de cobertura do abastecemento
- Que o inmovible a abastecer non conte coas instalacións interiores adecuadas ou non dispoña de acometida para vertido de augas residuais e pluviais de forma independente ou separada, ou non teña resolto o sistema de evacuación das mesmas.
- Por falla de presentación dos documentos esixidos
- Cando algunha parte das instalacións xerais deba discorrer por propiedade de terceiros, e non se conte coas autorizacións pertinentes ou con constitución de servidume de paso inscrita no Rexistro da Propiedade
- Cando a presión no punto de acometida de abastecemento sexa insuficiente ou excesiva para un correcto servizo e non se instalaran a cargo do aboado as medidas correctoras correspondentes

Artigo 13.- Instalación de acometidas

1. A instalación de acometidas dende a rede de servizo poderá ser realizada polo Concello ou por instalador autorizado baixo a supervisión dos técnicos do Concello de Xove.
2. O Concello, a tal efecto, confeccionará o orzamento para a execución das obras en base ó Acordo Regulador do Prezo Público pola prestación de servizos mediante persoal, maquinaria e outros medios municipais, repercutindo os prezos correspondentes de se-lo caso.
3. No caso de ser executadas as obras polo Concello, o petionario deberá facer efectivo o importe da correspondente exacción no prazo que se estableza na liquidación correspondente.
4. No suposto de existir diferencias entre o liquidado e a obra realmente executada xirarse liquidación complementaria unha vez rematadas as mesmas.

Artigo 14.- Modificación de acometidas

1. Queda expresamente prohibida a utilización dunha subministración de auga para outra finca, propiedade ou actividade distinta daquela para a que se contratou, aínda cando pertenza ó mesmo dono. No caso de segregacións, divisións ou acumulacións, aínda que non estiveran rexistradas oficialmente, deberán comunicarse estas circunstancias ó Concello, para a modificacións das condicións de acometida e no seu caso, da autorización de subministración de auga.

CAPÍTULO V. CONTADORES

Artigo 15.- Equipos de medida

Sen perxuicio do establecido para cada caso polas normas básicas para instalacións interiores da subministración de auga, as medicións do consumo que han de servir de base para a facturación de toda subministración realizaranse por contador, que é o único medio que dará fe da contabilización do consumo. Como norma xeral, as medicións do consumo efectuarase mediante:

-Contador único.- Cando no inmovible ou finca só exista unha vivenda ou local, en subministracións provisionais para obras e en polígonos en proceso de execución de obras e en tanto non sexan recibidas as súas redes de distribución interior.

-Batería de contadores divisionarios: cando exista máis dunha vivenda ou local será obrigatorio instalar un aparato de medida para cada unha delas e os necesarios para os servizos comúns. No caso de que por razóns técnicas excepcionais contrastadas polos servizos técnicos do Concello non sexa posible a instalación da batería de contadores divisionarios nun inmovible con máis dunha

vivenda ou local, o Concello poderá autoriza-la existencia dun contador xeral para toda a comunidade, pero o mínimo obrigatorio de consumo será facturado a tódalas vivendas ou locais, sen perxucio do recibo xeral que deberá aboar a comunidade, que será a responsable do pago do mesmo.

En vivendas plurifamiliares deberá esixirse a colocación dun regulador de presión así como dunha válvula de retención.

Artigo 16.- Usuarios sen contador

Nos abastecementos existentes sen contador, o Concello requerirá ó usuario a súa instalación, conferindo ó efecto un prazo non inferior a 10 días nin superior a 30.

Unha vez instalado polo usuario a instalación será verificada polo Concello.

Unha vez rematado o prazo sen que o usuario teña procedido á instalación do contador, o Concello poderá proceder ó corte da subministración, sen prexuízo das sancións que se lle poideran impor, precintando a toma e quedando obrigado o usuario á tramitación dunha nova alta, co pago dos correspondentes dereitos no caso de querer recupera-lo servizo.

Artigo 17.- Avería fehaciente de contadores

No caso de que ó realiza-la lectura e durante as visitas de inspección se comprobara fehacientemente que o contador está averiado, requerirase ó usuario para a súa inmediata reparación ou substitución, conferindo ó efecto un prazo non inferior a 10 días nin superior a 30. Durante este prazo o consumo facturado será estimado polo servizo como máximo como media das lecturas dos tres últimos recibos emitidos. Unha vez reparado ou instalado un contador novo, o seu correcto funcionamento será verificado polo Concello. O consumo así estimado terá o carácter de firme.

A avería de contadores deberá ser apreciada mediante informe responsable emitido polos técnicos do servizo municipal de subministro de auga.

Unha vez rematado o prazo exposto sen que o usuario teña procedido á reparación ou substitución do contador, o Concello poderá proceder ó corte da subministración, sen prexuízo das sancións que se lle poideran impor, precintando a toma e quedando obrigado o usuario á tramitación dunha nova alta, co pago dos correspondentes dereitos no caso de querer recupera-lo servizo.

Artigo 18.- Contadores con deficiencia de instalación

No caso de que durante as visitas de inspección se detectara que algún contador non cumpre en canto á súa localización, forma de instalación ou acceso ó mesmo cos requisitos e condicións a que se fai mención neste Regulamento, o Concello poderá efectuar o requerimento ó efecto seguindo o procedemento regulado no artigo anterior.

Se a deficiencia consistise en ter o contador situado nun lugar que careza de acceso directo desde a vía pública e durante as visitas efectuadas para proceder á lectura do mesmo estivera pechada a finca, local ou vivenda, ou por calquera outra cause fose imposible realizala, tomarase como lectura o consumo equivalente a 60,00 euros bimensuais, en tanto en canto o usuario non repare a deficiencia. O consumo así estimado terá o carácter de a conta do que se obteña coa lectura real do contador. A situación normalizarase, por exceso ou defecto, nas facturacións dos seguintes periodos a tenor da lectura practicada en cada un deles.

CAPÍTULO VI. CONDICIÓN DAS SUBMINISTRACIÓN DE AUGA. CONCESIÓN E SUSPENSIÓN

Artigo 19.- Carácter da subministración

En función do uso que se faga da auga o carácter da subministración tipificarase en:

a) Subministracións para usos domésticos

Son aquelas nos que a auga se utiliza exclusivamente para atender as necesidades primarias da vida, preparación de alimentos e hixiene persoal. Aplicarase esta modalidade ós locais destinados a vivendas ou anexos ás vivendas, sempre que neles non se realice actividade comercial, industrial, profesional nin de servizos de ningún tipo, aplicándose o uso da auga a unha soa familia.

Tamén se consideran dentro deste grupo os usos de auga para rego de xardíns, enchido de piscinas en domicilios particulares e, sempre que non revistan o carácter de explotación agropecuaria con destino á venda, os inmobles de carácter rústico.

b) Subministracións para obras ás que se refire o segundo parágrafo do artigo 11.

c) Subministracións para usos industriais, comerciais ou agropecuarios.

Son aqueles nos que a auga constitúe un elemento directo ou indirecto dun proceso de produción ou nos que se utiliza para o acondicionamento, limpeza ou hixiene dun establecemento profesional, comercial, industrial, de servizos ou agropecuario con destino á venda.

Aplicarase esta modalidade a tódolos locais ou establecementos nos que se desenvolva unha actividade industrial, comercial, profesional ou de servizos, sexa ou non lucrativa e, en xeral, para todos aqueles non destinados a vivenda.

Artigo 20.- Solicitudade da subministración

Previo á contratación da subministración o petionario deberá presentar unha solicitudade de subministración no impreso que a tal efecto proporcionará o Concello. Na solicitudade farase constar o nome do solicitante, uso da auga, finca a que se destina e demais circunstancias que se consideren relevantes para a correcta definición das características e condicións do subministro así como a esixencia da correspondente taxa.

Xunto coa solicitudade deberá presentarse a seguinte documentación, en función do destino da subministración:

1.- Subministración para uso doméstico.

Solicitarase o boletín de instalación de fontanería da Delegación de Industria se fose o caso. A solicitudade de subministración definitiva será requisito para a tramitación da correspondente licenza de primeira ocupación. Unha vez obtida esta e simultaneamente poderá concederse a subministración solicitada sempre e cando se cumpran tódolos requisitos necesarios para poder gozar da mesma.

2.- Subministración para usos industriais e comerciais

Solicitarase a licenza municipal de apertura

3.- Subministracións para usos agropecuarios

Solicitarase a alta da explotación.

No caso de subministración para obras estarase ó xa regulado no artigo 11 do presente Regulamento.

Artigo 21.- Denegación da subministración

O Concello poderá denegar-la contratación da subministración nos seguintes casos:

- Cando non teña aboado as correspondentes taxas de acometida se fose o caso
- Cando na instalación o peticionario non teña cumprido as prescricións que establece a normativa vixente así como as que poda esixi-la entidade subministradora
- Cando non se dispoña de acometida para a subministración de auga

Artigo 22.- Traslado e cambio de aboados.

Os traslados de domicilio e conseguinte ocupación do local por persoa distinta do usuario inicial, constituirán cambio de titularidade ou subrogación nas condicións da subministración, debendo satisfacerse se fose o caso os importes fixados pola correspondente Ordenanza ademais dos recibos pendentes de pago que podan corresponder ó citado local.

Artigo 23.- Duración da subministración

A concesión de subministración de auga outorgarase por norma xeral por tempo indefinido. Sen embargo o aboado poderá solicita-la baixa de acordo co disposto no artigo 24 seguinte.

Artigo 24.- Baixas no servizo

Os usuarios poderán solicita-la baixa da subministración de auga presentando a correspondente comunicación no rexistro Municipal con indicación da data de cese. No caso de que esta sexa aceptada, procederase ó corte da subministración mediante o precintado da toma, podendo a tal efecto o persoal da entidade subministradora e se fose o caso, facer entrada no local correspondente. De ter cesado a ocupación da finca para a que se formalizou a subministración e non ter o aboado presentado a baixa cedendo o uso da auga a un terceiro, xeraranse responsabilidade para aquel no sentido de que será responsable solidario do consumo de auga que se produza con posterioridade ó cese na ocupación.

A baixa no Padrón de aboados e os conseguintes efectos económicos surtirán efectos a partires do bimestre seguinte a aquel no que se presentou a solicitude.

Cando o aboado deixe causar baixa na subministración, virá obrigado a aboar tódolos recibos pendentes e o importe total da facturación do bimestre no que cause baixa.

Artigo 25.- Causas e procedemento de suspensión da subministración

O Concello poderá, sen prexuízo do exercicio das accións de orde civil, penal ou administrativo que a lexislación vixente ampare, suspender o subministro ós seus aboados ou usuarios nos casos seguintes:

- a) Por ter pendentes de pago os recibos correspondentes a dous bimestres, sexan consecutivos ou non; ou ben as taxas de acometida se fose o caso. En tal caso presumirase que o usuario se da de baixa do servizo.
- b) Cando se desfrute de subministración de auga sen autorización
- c) Cando se faga uso da auga distinto do solicitado
- d) Cando dispoña de derivacións nas súas redes con consumo de auga realizadas sen a oportuna autorización ou de xeito clandestino

e) Cando o aboado non permita a entrada no domicilio, finca ou local a que afecta a subministración, en horas hábiles ou de normal relación co exterior, ó persoal do Concello, para a realización das pertinentes comprobacións ou cando o contador se atope en lugar inaccesible

f) Cando o aboado mesture augas doutra procedencia

g) Por non atender requirimentos do Concello respecto de avarías ou colocación de contadores segundo o disposto nos artigos 18 e 19 do presente Regulamento, ou desatender calquera outro tipo de requirimento relativo ó cumprimento do disposto no presente Regulamento.

h) En caso de realizar vertidos non autorizados que podan producir danos nas instalacións de saneamento ou depuración.

Nos casos sinalados nas letras b) e d) O Concello poderá proceder ó corte inmediato da subministración, mediante resolución, debendo o interesado no caso de solicitar a recuperación do mesmo, aboar as correspondentes taxas se fose o caso.

No resto dos casos, deberá darse audiencia ó interesado por un prazo mínimo de cinco días. Caso de non presentarse este no trámite de audiencia, adoptárase resolución de suspensión da subministración, debendo aboar no caso de solicitar a recuperación do mesmo, as correspondentes taxas se fose o caso. No caso de que o interesado formule reclamación dentro do trámite de audiencia, non se lle poderá suspender a subministración en tanto en canto non recaia resolución definitiva.

En tódolos casos, da resolución que se adopte deberá darse traslado ó usuario.

A notificación do corte de subministración incluírá como mínimo:

-Nome e dirección do aboado

-Nome e dirección do abono

-Data e hora aproximada en que se producirá o corte da subministración

-Detalle da razón que orixina o corte

-Horario das oficinas do Concello no que se poden subsana-las causas que orixinan o corte.

A suspensión so subministro polos motivos anteriormente expostos producirá a baixa do aboado no Padrón da correspondente taxa. A continuación do mesmo só poderá efectuarse mediante nova solicitude e pagamento da correspondente taxa se fose o caso.

Artigo 26.- Outras infraccións

As accións ou omisións que non revistan a gravidade do exposto serán consideradas falta leve e sancionaranse, previa instrución do oportuno expediente, con multa na contía que autorice a lexislación vixente.

CAPÍTULO VII. REGULARIDADE NA SUBMINISTRACIÓN

Artigo 27.- Continuidade no servizo

Salvo causa de forza maior e avarías nas instalacións públicas, o Concello ten a obriga de manter permanentemente o servizo.

Artigo 28.- Suspensións temporais

O Concello poderá suspender temporalmente o servizo cando sexa imprescindible para proceder ó mantemento, reparación ou mellora das instalacións ó seu cargo ou cando a auga perda a

condición de potabilidade implicando isto un risco inminente para a saúde da poboación abastecida. Asímesmo poderase suspender de xeito temporal o servizo por causas de forza maior ou de recoñecida urxencia.

A suspensión temporal non dará lugar a reclamacións compensatorias ou indemnizatorias por parte dos usuarios do servizo.

Artigo 29.- Restricións da subministración

En caso de necesidade debidamente motivada o Concello poderá restrinxi-lo uso de auga, tendo preferencia en todo caso o uso doméstico. Non obstante, e aínda que segundo o artigo 21.a) se consideran uso doméstico, as restricións nos abastecementos afectarán en primeiro lugar ós regos de xardíns, fincas de recreo e enchido de piscinas.

CAPÍTULO VIII. LECTURAS, CONSUMOS E FACTURACIÓNS

Artigo 30.-Periodicidade das lecturas

O Concello está obrigada a establecer un sistema de toma de lecturas permanente e período, de xeito que, para cada aboado os ciclos de lecturas conteñan no posible o mesmo número de días.

A efectos de facturación de consumos a frecuencia con que a entidade subministradora poderá efectua-las lecturas será bimensual.

Artigo 31.- Consumos estimados

Cando exista calquera circunstancia distinta da regulada nos artigos 16 a 18 do presente Regulamento, os consumos estimaranse segundo o disposto no artigo 17 ou no seu defecto, no artigo 18.

Artigo 32. Requisitos de facturas ou/e recibos

Nas lecturas ou recibos emitidos polo Concello, deberán constar como mínimo os seguintes conceptos:

- Domicilio obxecto da subministración
- Domicilio de notificación se é distinto
- Tarifa aplicada
- Calibre do contador
- Lecturas do contador que determinan o consumo facturado e data das mesmas que definan o prazo de facturación
- Indicación de se os consumos facturados son reais ou estimados
- Indicación diferenciada dos conceptos que se facturen
- Importe dos tributos que se repercuten
- Importe total dos servizos que se presten
- Domicilio ou domicilios de pago e prazos para efectualo

CAPÍTULO IX. RÉXIME ECONÓMICO

Artigo 33.- Dereitos económicos

Serán os regulados no presente Regulamento así como nas Ordenanzas Fiscais reguladoras das correspondentes taxas ou Acordos Reguladores de prezos públicos.

CAPÍTULO X. RÉXIME XURÍDICO

Artigo 34.- Resolucíons municipais

Contra os actos e resolucíons do Concello caberán as accións e recursos que prevé a Lei 30/1992, de 30 de novembro, de Réxime Xurídico e Procedemento Administrativo Común, e demais disposicións legais de aplicación

DISPOSICIÓN FINAL

O presente Regulamento entrará en vigor ó día seguinte da súa publicación no B.O.P., debendo ademais transcurri-lo prazo de quince días previsto no artigo 65.2 da Lei 7/85, de 2 de abril, para impugnación do acordo pola Administración da Comunidade Autónoma e do Estado, comenzando a aplicarse o bimestre natural seguinte ó da súa entrada en vigor.

5º) EXPEDIENTE DE MODIFICACIÓN DE CRÉDITOS DO ORZAMENTO MUNICIPAL DO EXERCICIO DE 2007, Nº 13, POR IMPORTE DE 874.408,44 EUROS. APROBACIÓN INICIAL. ADOPCIÓN DE ACORDO.

Por Secretaría dáse conta á Corporación do expediente do epígrafe.

Aberto o debate, polo Sr. Pernas Rodríguez manifestase que se no debate no asunto anterior, criticouse a falla de consenso e de información por parte do equipo de goberno no presente asunto; esa falla de información é absolutamente irresponsable, xa que estamos a falar dunha modificación de crédito por importe de 150 millóns das antigas Pesetas, e que contempla entre outras, a creación dunha nova partida, a 432.611, para executar unha obra con mais de 100 millóns de Pesetas de presuposto, da que os grupos da oposición soamente coñecen, o que pon un telefax dunha soa folla remitido por unha empresa de Enxeñería.

Polo Sr. Alcalde manifestase que resulta incomprensible que o Sr. Pernas Rodríguez manifeste que descoñece absolutamente todo o relativo á ampliación da ponte de FEVE, cando o Grupo de Goberno do que ó Sr. Pernas Rodríguez era Primeiro Tenente de Alcalde, xa encargara no seu día proxectos sobre dita obra.

Remata a intervención o Sr. Alcalde, sinalando que ó remate da Comisión de Contas celebrada o xoves da semana pasada, xa comunicou ós portavoces de AVEXO e do PSOE cal era o contido deste expediente de modificación de créditos.

Polo Sr. Fernández Bouza manifestase que antes de inverter mais de 500.000 Euros, é necesario pensa-las cousas detidamente e contar coa colaboración de tódolos grupos municipais, engadindo que o BNG considera que gastar esa enorme cantidade de diñeiro en acondicionar e mellorar un tramo de 600 metros de camiño, en principio parece unha barbaridade, tendo en conta a posibilidade de executar outras alternativas moito mais económicas.

Polo Sr. Ben Fernández manifestase que tamén considera excesiva a inversión prevista na partida 432.611 sobre todo tendo en conta que a execución da obra prevista non daría solución completa os problemas que presenta dita vía.

Rematado o debate, a Corporación, cos votos a favor dos Sres. Salgueiro Rapa, Balseiro Canoura, González Álvarez, Abad López, e Meitin Guerreiro, e o voto en contra dos Sres. Pernas

Rodríguez, Vázquez Frá, Fernández Basanta, Casabella Lage, Ben Fernández e Fernández Bouza, acorda rexeita-la aprobación inicial do expediente de modificación de crédito do epígrafe.

6º) MOCIÓN PRESENTADA POLO GRUPO MUNICIPAL DO PSDEG-PSOE VERBO DA POSIBILIDADE DE COMPRA DO ANTIGO SALÓN DE LAGO E TERREOS ANEXOS. ADOPCIÓN DE ACORDO.

Coa autorización da presidencia, polo Sr. Ben Fernández dáse lectura ó Concello Pleno da Moción do epígrafe, que a seguir se transcribe:

“Don Modesto Ben Fernández, na súa condición de voceiro do Grupo Municipal Socialista no Concello de Xove, ó abeiro do disposto no artigo 91.4 do Real Decreto 2568/1986, do 28 de Novembro, polo que se aproba o Regulamento de Organización, Funcionamento e Réxime Xurídico das Entidades Locais, presenta á consideración do Pleno Corporación Municipal a seguinte MOCIÓN:

Debido a estreited e a falla de visibilidade no cruce da estrada de Xove a Lago co a que vai de Beltrán a Praia de Lago (Antigo salón de Lago).

Polo anteriormente exposto, propoño o pleno desta Corporación a adopción do seguinte acordo:

Que se fagan as xestións precisas para a compra do antigo salón de Lago e os terreos necesarios para ampliación de dito cruce e poder eliminar a estreited e a peligrosidade en esa zona.”

Aberto o debate, polo Sr. Alcalde manifestase que está de acordo coa moción presentada polo Sr. Ben Fernández, engadindo que de feito xa se mantiveron reunións co propietario da finca co obxectivo de intentar acadar un prezo inferior ó ofertado inicialmente.

Sinala o Sr. Alcalde que a oferta final da propiedade presentada por escrito e que obra no expediente é de 114.200,00€ pola compra da finca e da edificación existente.

Remata a súa intervención o Sr. Alcalde sinalando que tamén obra no expediente a certificación expedida pola Interventora Municipal, acreditativa da existencia de crédito suficiente e axeitado na partida 430.680 do vixente orzamento municipal, así como o informe-valoración elaborado polo Arquitecto Técnico Municipal, informando favorablemente a compra de ditos inmobles no prezo ofertado anteriormente sinalado.

Polo Sres. Pernas Rodríguez, Ben Fernández e Fernández Bouza, manifestase que os seus respectivos grupos están de acordo coa compra dos bens de referencia, e co prezo ofertado pola propiedade.

Polo Sr. Alcalde, á vista da unanimidade existente, solicita ó Sr. Ben Fernández a modificación da moción presentada, de xeito que o Concello Pleno adopte acordo polo que se proceda á adquisición dos bens citados no prezo de referencia.

Polo Sr. Ben Fernández manifestase que non existe inconveniente ningún en aceptar dita modificación, xa que precisamente o obxectivo da moción presentada polo PSdeG-PSOE era proceder á compra de ditos bens para mellora-la seguridade vial nesa zona.

Rematado o debate, o Concello Pleno, por unanimidade dos seus membros asistentes á sesión, acorda comprar a D. Francico José Mendez Carro, titular do DNI 33.858.739-W no prezo ofertado de 114.200,00€ (impostos incluídos), a finca sita en Cruce Iglesia en Ancil (Lago-Xove) de referencia catastral 27025A069000230000JZ (Polígono 69, parcela 23) de 4.631,00 m2 e a edificación anexa en terreno de 359,79 m2; sendo de conta do Concello de Xove o abono de gastos de formalización en escritura pública e inscrición no rexistro da propiedade.

7º) MOCIÓN PRESENTADA POLO GRUPO MUNICIPAL DO PSDEG-PSOE VERBO DA COLABORACIÓN DO CONCELLO COA CELEBRACIÓN DAS FESTAS PATRONAIS NAS DIFERENTES PARROQUIAS DO CONCELLO. ADOPCIÓN DE ACORDO.

Coa autorización da presidencia, polo Sr. Ben Fernández dáse lectura ó Concello Pleno da Moción do epígrafe, que a seguir se transcribe:

“ Don Modesto Ben Fernández, na súa condición de voceiro do Grupo Municipal Socialista no Concello de Xove, ó abeiro do disposto no artigo 91.4 do Real Decreto 2568/1986, do 28 de Novembro, polo que se aproba o Regulamento de Organización, Funcionamento e Réxime Xurídico das Entidades Locais, presenta á consideración do Pleno Corporación Municipal a seguinte MOCIÓN:

Durante os últimos anos e visible as dificultades que están pasando as parroquias para a celebración das súas festas patronais.

Polo anteriormente exposto, propoño o pleno desta corporación a adopción do seguinte acordo: Que o concello se faiga cargo da celebración de dous días de festa en cada parroquia con dúas orquestras cada día con cargo os presupostos do concello.

A se mesmo na capitalidade do concello se fagan unhas festas de unha semana mínimo de duración con días para os nenos, xovenes, maiores e atraccións de distintas especialidades, etc.

Non e normal que as festas de Xove se estean facendo como se fixeron toda a vida con dous días de festa e unha sardiñada.

Propoño se habilite unha comisión de persoal do concello para tal fin e persoas das distintas parroquias.”

Aberto o debate, polo Sr. Alcalde manifestase que pola súa experiencia como Alcalde, e sobre todo como membro durante moitos anos da comisión organizadora das festas de Lago, é da opinión que resulta casi imposible ou alomenos moi problemático que o Concello se meta ou poida organiza-las festas de tódalas parroquias do Concello e facerse cargo do abono das orquestras que actúen nas mesmas, xa que dependendo das datas de celebración, os importes da facturación das orquestras ten unhas diferenzas enormes, o que pode provocar situacións inxustas, derivadas da cantidade de diñeiro que se destina a unha parroquia ou outra, ou da calidade ou nivel artístico das orquestras que en cada caso, dependendo das datas, poidan contratarse.

Polo Sr. Pernas Rodriguez manifestase que o seu grupo tamén considera moi difícil que o Concello poda facerse cargo das festas de tódalas parroquias, polas especificidades que en cada caso ou en cada parroquia existen.

Polo Sr. Fernández Bouza manifestase que na opinión do BNG o Concello de Xove é incluso demasiado esplendido coas cantidades que aporta para a celebración das festas de cada parroquia, sinalando que sen embargo as festas da capitalidade, como festas de todo o Concello, e de tódolos veciños, con independencia da súa parroquia, deberían ser potenciadas dende o Concello, e organizadas dende o mesmo.

Polo Sr. Alcalde manifestase que nos orzamentos do ano 2008, dunha banda, a cantidade de 6.000 Euros que anteriormente se consignaba para cada Comisión de Festas, incrementárase polo importe do IVA que ditas comisións teñen que abonar, e doutra banda, o Concello de Xove ten previsto que nas festas patronais de San Bartolo, se celebre un maior número de actividades dirixidas a tódolos sectores de poboación aumentándose o número de días co fin de potenciar ditas festas.

Rematado o debate, a Corporación, co voto favorable do Sr. Ben Fernández, e o voto en contra dos Sres. Salgueiro Rapa, Balseiro Canoura, González Alvarez, Abad López, e Meitin Guerreiro, acorda rexeita-la aprobación da moción anteriormente transcrita.

Os Sres. Pernas Rodríguez, Vázquez Frá, Fernández Basanta, Casabella Lage, e Fernández Bouza abstéñense.

8º) MOCIÓN PRESENTADA POLO GRUPO MUNICIPAL DO PARTIDO POPULAR VERBO DO PLAN DE REEQUILIBRIO TERRITORIAL DE GALICIA. ADOPCIÓN DE ACORDO.

Por Secretaría dáse conta ó Concello Pleno da Moción do epígrafe, que a seguir se transcribe:

“O GRUPO MUNICIPAL DO PARTIDO POPULAR DE GALICIA (PPdeG) no Concello de Xove a través do seu portavoz D. José Manuel González Álvarez en base á lexislación vixente, presenta a seguinte:

Que se fundamenta na seguinte: EXPOSICIÓN DE MOTIVOS que se detalla de seguido:

O 25 de xuño de 2007, o Presidente da Xunta de Galicia fixo público o contido do Plan de Reequilibrio Territorial. A través deste documento, o Executivo autonómico comprométese a executar unha serie de actuacións e investimentos, en varios concellos da xeografía galega, co obxecto de impulsar o desenvolvemento económico, equilibrado e sostible de Galicia, reforzando a cohesión socio-territorial e, impulsando unha serie de actuacións orientadas a corrixir os desequilibrios internos a partir dun proceso de dinamización económica, planificación e coordinación das actuacións das distintas Administracións Públicas en infraestruturas, apoio aos sectores produtivos e equipamentos.

Pese a bondade do obxectivo final deste proxecto, unha simple análise do seu contido permite evidenciar graves carencias. Non só porque se limita a ser unha compilación de actuacións pendentes de executar que, en moitos casos, foron paralizadas pese a súa importancia, tras o acceso ao poder do Goberno bipartito de Galicia, senón tamén porque non establece, de xeito rigoroso, o prazo de execución dos proxectos nel contidos, nin as previsións orzamentarias concretas nas que se deberán asentar os devanditos investimentos.

Con todo, a maior das eivas do Plan de Reequilibrio Territorial, ten a súa orixe na falta de participación dos Concellos na súa elaboración, o que non deixa de ser un verdadeiro fraude ás entidades locais. Polo tanto, neste plan, están ausentes importantes actuacións e investimentos que contribuirían, dun xeito decidido, ao correcto desenvolvemento do noso territorio ademais de constituír proxectos prioritarios, que deberán ser executados con urxencia.

Polo que respecta á Marina lucense os actuais Orzamentos da Xunta de Galicia reduciron en máis dun 26% os investimentos en fondos con destino determinado. Isto supón 8 millóns de euros menos que no ano 2006. O gasto por habitante caeu dos 403 euros en 2006, a 297 euros en 2007, o que supón unha redución de 105 €por cada mariñan. O Goberno bipartito, na nosa comarca, pode ser considerado como o Goberno do freazo. Disto dedúcese que non existe un compromiso inversor da Xunta Galicia nas bisbarras da Marina lucense e o Plan de Reequilibrio Territorial de Galicia non cambia esta situación.

Tanto os orzamentos da Xunta de Galicia como o propio Plan de Reequilibrio Territorial de Galicia esquecen importantes actuacións que resultan prioritarias para o correcto desenvolvemento da nosa comarca incluso, algunhas delas, formuladas como compromisos electorais da do PSOE e do BNG: ampliación do Hospital da Costa, Polígono supramunicipal de ALCOA, Escola Náutico-

Pesqueira de Burela, P.A.C. de Foz, ou arranxo das estradas Viveiro-Ferreira, Reme-Vilamar, e os investimentos pendentes nos parques de bombeiros mariñáns.

Co obxecto de contribuír a facer visibles as distintas actuacións cuxa presenza deberá garantirse na redacción definitiva do Plan de Reequilibrio Territorial de Galicia, pola súa relevancia no ámbito das bisbarras da Marina lucense, e por coincidir todas elas coa finalidade principal do devandito plan: acadar o desenvolvemento equilibrado de todo o noso territorio, o Grupo Municipal que subscribe, considera de interese municipal prioritario que o Pleno da Corporación ACORDE:

O Pleno do Concello de Xove insta á Xunta de Galicia a:

PRIMEIRO.- Que se teña en conta a participación do Concello de Xove na elaboración definitiva do Plan de Reequilibrio Territorial de Galicia, de tal xeito que se poidan incorporar as seguintes actuacións de relevancia comarcal orientadas ao desenvolvemento sostible e equilibrado do noso territorio:

- Ampliación do Hospital da Costa.
- Adquisición dunha resonancia magnética permanente para o centro hospitalario situado en Burela.
- Liña de ferrocarril que una a comarca da Marina lucense coa capital da provincia.
- Apertura ao tráfico xeral do dique norte de ALCOA.
- AVE transcantábrico.
- Parque de bombeiros da Marina Occidental.
- Parque de bombeiros da Marina Central e Oriental.
- Construción da Escola Náutico Pesqueira de Burela.
- Polígono Industrial de Alfoz- O Valadouro.
- Ampliación do Polígono Industrial de Camba.
- Segunda fase do proxecto de vivendas no Barrio dos Muíños (Mondoñedo).
- Construción dun novo centro de saúde en Cervo.
- Posta en marcha dun Punto de Atención Continuada en Foz.
- Ampliación do actual centro de saúde de Barreiros.
- Ampliación do saneamento integral de Barreiros-Foz.
- Acceso ao portos de Celeiro.
- Estrada Reme-Vilamar.
- Rexeneración do firme na estrada» LU-161 (tramo Mondoñedo- Ferreira).
- Rexeneración do firme da estrada Vilameá-Riotorto.
- Rexeneración do firme da estrada LU-160 (tramo Mondoñedo- O Valadouro).
- Adquisición e apertura da Casa Museo "Alvaro Cunqueiro".
- Recuperación arqueolóxica e patrimonial do Complexo Histórico Artístico de Sargadelos.
- Remate dos traballos da concentración parcelaría Val de Foz.(Alfoz)

- Concentración Parcelaria Monte Vilapena. (1a Fase) (Trabada)
- Estrada Viveiro- O Valadouro.
- Creación dun novo xulgado de primeira instancia e instrución en Ribadeo.

SEGUNDO.- O Concello de Xove remitirá o contido do presente acordo á Presidencia da Xunta de Galicia, así como tamén a cada un dos Grupos Parlamentarios da Cámara galega e aos órganos de dirección da Federación Galega de Municipios e Provincias de tal xeito que, todos eles, poidan coñecer os termos do acordado na sesión plenaria da Corporación Municipal.

Aberto o debate, polo Sr. Pernas Rodríguez manifestase que con independencia que o seu grupo vaia votar a favor da aprobación da Moción, non parece que teña moito sentido que o Pleno do Concello de Xove perda o tempo debatendo e votando Mocións tipo, que na maior parte do seu contido pouco ou nada teñen que ver cos intereses do Concello de Xove e dos seus veciños como é caso desta Moción na que se solicitan obras como concentracións parcelarias en Trabada ou acondicionamentos de estradas en Riotorto que non parecen cuestións nas que deba centrarse a xestión dos asuntos do Concello de Xove.

Polo Sr. Alcalde manifestase que a Moción sometese ó coñecemento do Concello de Xove como Concello integrado na Mariña de Lugo sen esquecer que determinados asuntos como a apertura do dique norte de Alcoa, a ampliación do Polígono de Camba, as obras do Corredor da Costa, ou a ampliación do Hospital da Costa son asuntos fundamentais para o desenvolvemento socio-económico de Xove.

Polo Sr. Fernández Bouza manifestase que non é de recibo que o Partido Popular reclame agora unhas obras que non fixo antes cando gobernou Galicia máis de 20 anos.

Engade o Sr. Fernández Bouza que o obxectivo fundamental do Plan de Reequilibrio Territorial é precisamente impulsa-lo desenvolvemento daquelas zonas do interior de Galicia que polo olvido ó que foron sometidas, constitúen unha Galicia de segunda moito máis atrasada que outra parte de Galicia na que se pode incluír a Mariña de Lugo.

Polo Sr. Ben Fernández manifestase que no pleno anterior xa se tratou outra Moción sobre o Plan de Reequilibrio Territorial, e na Orde do Día desta mesma sesión figura outra Moción máis sobre o mesmo tema das inversións da Xunta na Mariña de Lugo, e todas esas Mocións son presentadas polo Partido Popular que nos seus máis de 20 anos de goberno autonómico foi incapaz de executar nin unha soa da obras ou infraestruturas que agora considera prioritarias, e cúa execución esixe a un Goberno que leva menos de dous anos gobernando.

Rematado o debate, o Concello Pleno cos votos favorables dos Sres. Salgueiro Rapa, Balseiro Canoura, González Alvarez, Abad López, Meitin Guerreiro, Pernas Rodríguez, Vázquez Frá, Fernández Basanta, e Casabella Lage, e co voto en contra dos Sres. Ben Fernández e Fernández Bouza , acorda aproba-la moción do epígrafe anteriormente transcrita.

9º) MOCIÓN PRESENTADA POLO GRUPO MUNICIPAL DO PARTIDO POPULAR VERBO DO IMPOSTO AUTONÓMICO SOBRE SUCESIÓN E DOACIÓN. ADOPCIÓN DE ACORDO.

Por Secretaría dáse lectura á moción do epígrafe que a seguir se transcribe:

“O Portavoz do Grupo Municipal do Partido Popular no Concello de Xove, D. José Manuel González Alvarez, ó abeiro da normativa vixente, presenta, para o seu debate e aprobación se procede polo Pleno da Corporación Municipal, a seguinte MOCIÓN que se basea na EXPOSICIÓN DE MOTIVOS que se detalla a continuación:

A Comunidade Autónoma de Galicia ten competencias normativas e de xestión sobre dos tributos cedidos segundo o previsto na Lei Orgánica 8/80, de 22 de Setembro, de Financiación das Comunidades Autónomas. Na mesma, recóllense os tributos cedidos sobre os que as comunidades autónomas dispoñen de competencias normativas nos termos que estableza a lei que ceda o tributo correspondinte; entre eses tributos está o Imposto sobre Sucesións e Doazóns.

A Lei 21/01, de 27 de Decembro, pola que se regulan as medidas fiscais e administrativas do novo sistema de financiamento das Comunidades Autónomas establece, para o Imposto de Sucesións e Doazóns, o alcance da cesión e os puntos de conexión; igualmente, fixa o marco normativo das comunidades autónomas no mencionado imposto, establecendo que estas poderán asumir competencias respecto de reducións da base imponible tanta para transmisión "intervivos", como "mortis causa"; redución da tarifa do imposto; da contía e coeficientes do patrimonio preexistente, e deducións e bonificacións da cota.

Pois ben, desde unha perspectiva práctica e de incidencia na economía das familias ou persoas físicas que están suxeitas ó imposto, non podemos obviar que este imposto aplícase sobre unha materia que xa ten sido obxecto de gravame como rendemento; polo que estamos ante un suposto de dobre imposición; igualmente, pódese argumentar que non hai incremento patrimonial cando a transmisión se produce dentro do núcleo da unidade familiar, podándose entender que debería ser esta, a unidade familiar, a unidade contribuínte.

É ben certo que na meirande parte dos casos, o abono deste imposto supón un grave quebranto para as economías familiares, sobre de todo no rural, xa que se ven abocados a abonar importes que en certos casos deixan as economías domésticas en situacións mesmo críticas.

Por riba, non debemos esquecer o considerable trastorno que supón que as persoas afectadas deban trasladarse á cidade de A Coruña para solicitar documentación imprescindible para a tramitación e abono do imposto, co que se está gravando aínda máis ás economías que xeralmente están en situación máis feble.

Por iso, pensamos que debemos ir a unha paulatina desaparición do Imposto de Sucesións e Doazóns; non sería lóxico pensar na desaparición inmediata, xa que privaría dunha fonte de ingresos presupostados á Administración Autonómica, pero sí podemos afirmar que pode ser factible que 2010 sexa o derradeiro exercicio fiscal no que se tribute por este imposto.

Polo tanto, desde o Grupo Municipal do Partido Popular, en función do anteriormente exposto, é polo que propoñemos ó Pleno da Corporación Municipal a adopción dos seguintes

ACORDOS

1 .- O Pleno da Corporación Municipal do Concello de Xove solicita da Administración Autonómica a desaparición do Imposto de Sucesións e Doazóns, de forma que o exercicio de 2010 sexa o derradeiro no que se tribute por tal concepto.

2.- Solicitar que tódolos trámites a efectuar polos afectados para liquidar o imposto, se poidan levar a cabo na capitalidade da provincia.

3.- Elevar os presentes acordos ó Presidente da Xunta de Galicia, á Mesa do Parlamento, e ós portavoces dos grupos políticos que conforman o Parlamento de Galicia, así como ó Presidente da Deputación e portavoces dos grupos provinciais.

O que se traslada ó Pleno da Corporación Municipal de Xove para o seu debate e aprobación se procede na vindeira sesión plenaria que se celebre.”

Aberto o debate, polo Sr. Pernas Rodríguez manifestase que o seu grupo vai votar a favor da aprobación da moción presentada, por considerar que o imposto de sucesións e doazóns é un imposto totalmente inxusto, que oculta unha dobre imposición e que supón unha discriminación para os galegos, xa que é un imposto que desapareceu noutras comunidades autónomas.

Remata a súa intervención o Sr. Pernas Rodríguez sinalando no obstante o anterior, quere manifestar que na súa opinión, a xestión deste imposto pódese facer desde a oficina liquidadora ubicada no rexistro da propiedade en Viveiro, sen necesidade de desprazamentos a Lugo ou a Coruña.

Polo Sr. Fernández Bouza manifestase que o BNG podería estar de acordo cunha redución ou mesmo unha supresión do imposto para patrimonios modestos, pero en ningún caso para tódolos patrimonios, xa que o sistema tributario debe ter como obxectivo fundamental a redistribución da riqueza.

Polo Sr. Alcalde manifestase que a moción non fala de deixar de pagar mais ou menos, senón de evitar a inxustiza que supón unha dobre imposición.

Polo Sr. Ben Fernández manifestase estar de acordo cos argumentos do Sr. Fernández Bouza, engadindo que sería totalmente antiprogresista suprimir este imposto para as grandes fortunas ou patrimonios.

Rematado o debate, o Concello Pleno cos votos favorables dos Sres. Salgueiro Rapa, Balseiro Canoura, González Alvarez, Abad López, Meitin Guerreiro, Pernas Rodríguez, Vázquez Frá, Fernández Basanta, e Casabella Lage, e co voto en contra dos Sres. Ben Fernández e Fernández Bouza , acorda aproba-la moción do epígrafe anteriormente transcrita.

10º) MOCIÓN DO PARTIDO POPULAR, VERBO DA MARXINACIÓN DA MARIÑA POLA FALLA DE INVESTIMENTOS DO GOBERNO AUTONÓMICO. ADOPCION DE ACORDO.

Por Secretaría dáse conta ó Concello Pleno da Moción do epígrafe, que a seguir se transcribe:

“O GRUPO MUNICIPAL DO PARTIDO POPULAR DE GALICIA (PPdeG) no Concello de Xove a través do seu portavoz D. José Manuel González Álvarez en base á lexislación vixente, presenta a seguinte:

Moción de rexeitamento da marxinação que está a sufrir A Mariña como consecuencia da falta de investimentos do goberno autonómico, que se fundamenta na seguinte:

EXPOSICIÓN DE MOTIVOS

Na Mariña lucense estanse a sufrir importantes prexuízos consecuencia, todos eles, dunha xestión do actual goberno bipartito da Xunta de Galicia que se está a caracterizar por obviar os investimentos alí onde son necesarios, e rexeitar aquelas actuacións que suporían un avance significativo para a nosa comarca. Pensadas polo tanto en clave de futuro. Con todo, o máis grave resulta ser o que poderíamos definir como unha política de progresivo baleirado de servizos, que actúa, irreversiblemente, en detrimento das cada vez maiores necesidades dos veciños da Marina lucense.

Sen dúbida, a perda de servizos máis significativa afecta á SANIDADE. Nos concellos de Alfoz e O Valadouro viron como 290 nenos en idade pediátrica deixaron de ter acceso ao especialista en medicina infantil nos seus respectivos centros de saúde, o que provocou gran malestar nas familias afectadas. Esta decisión do SERGAS implica que moitas destas familias deben desprazarse ata trinta e cinco quilómetros para chegar ao centro pediátrico de referencia, situado na localidade de

Foz, ou moito máis aínda, para ter acceso a unha consulta especializada e urxente no Hospital da Costa.

Os servizos sanitarios na Marina resultan ser os principais protagonistas dos incumprimentos do novo Goberno galego coa nosa comarca. A situación actual amosa unha sanidade colapsada, tanto no centro hospitalario, como na atención especializada e urxente, chegando incluso a detectarse un feito inaudito, largas LISTAS DE ESPERA NA ATENCIÓN PRIMARIA, tanto en relación coas citas para consulta médica, como para a prescrición de receitas.

Por outra banda, non debemos esquecer que os partidos que apoian ao Goberno galego prometeron, en diversas ocasións, acometer a AMPLIACIÓN DO HOSPITAL DA COSTA. A última a través dun acordo parlamentario ao que se chegou como consecuencia dunha iniciativa promovida polo Partido Popular de Galicia. Esta ampliación do centro hospitalario mariñan, tan necesaria como ineludible, atende a factores de moi diversa índole: demográficos, estruturais e de necesidades de persoal. Pese ao indicado, a día de hoxe, o bipartito foi incapaz nin tan sequera de encargar o correspondente estudo, nin completar unha partida específica para esta cuestión nos orzamentos autonómicos para 2008.

Por outra banda, os investimentos necesarios para contar cunha RESONANCIA MAGNÉTICA PERMANENTE no Hospital da Costa non chegaron, nin teñen visos de chegar. De novo, un incumprimento electoral das forzas que conforman o bipartito e un grave desprezo as aspiracións e necesidades dos usuarios que deben esperar, periodicamente, á presenza dunha resonancia itinerante, compartida con outros centros galegos.

Analizando polo miúdo os orzamentos autonómicos, os centros hospitalarios da nosa provincia, incluído o mariñan, ocupan o vagón de cola no investimento sanitario de entre os dez que sempre mantiveron un modelo de xestión estritamente pública. Estes datos, en nada favorecen os esforzos por atallar as graves carencias na prestación de servizos que se están a dar neste centro: a larga lista de espera para o acceso a determinadas especialidades médicas, e o defectuoso funcionamento dos servizos de atención ao cliente.

Finalmente, as promesas efectuadas por socialistas e nacionalistas para habilitar un Punto de Atención Continuada (PAC) en Foz, tampouco resultaron cumpridas. A Xunta puxo en marcha pequenas melloras nos servizos e horarios de atención sanitaria nesa localidade, de xeito especial nos meses de maior afluencia turística. Ben é certo que, tal e como testemuñan veciños e usuarios, estas melloras tampouco se están a cumprir no cen por cen dos casos, nin en Foz nin no resto dos centros de saúde da Marina onde o SERGAS vese incapaz de cubrir as baixas médicas.

A todo isto, debemos engadir a perda das VISTAS DO PENAL que se estaban a celebrar nos xulgados de Primeira Instancia de Mondoñedo e Viveiro. Esta circunstancia obriga ás familias inmersas nalgún destes procesos, aos profesionais do dereito; así como tamén a aquelas outras persoas como testemuñas ou peritos, a desprazarse ata a capital lucense, sen importar os múltiples prexuízos e o maior gasto -asumido polos veciños- que implica este desprazamento.

A Xunta de Galicia tampouco ten intención de instar unha modificación na planta xudicial que permita a creación dun XULGADO DE PRIMEIRA INSTANCIA E INSTRUCCIÓN na localidade de Ribadeo, tal e como demandan os veciños e tal e como aconsella e posibilita a gran carga de trabado existente nos municipios máis próximos.

En materia de infraestruturas, tamén existen importantes incumprimentos do Goberno bipartito. Os trámites e obras de construción do CORREDOR BARREIROS-FERROL, no seu tramo de titularidade autonómica, véñse sometidos a continuos atrasos. Os orzamentos do 2008 recollen unha consignación que ascende a 712.000 euros, menos do 4% da consignación plurianual

prevista nos orzamentos de 2007. O bipartito reformula as súas contas, unha vez máis, en detrimento dos intereses dos mariñáns e afasta o horizonte temporal de finalización dunha obra, a vía de alta capacidade Ferrol-San Cibrao, básica para articular e comunicar todos os concellos da costa das provincias de Lugo e A Coruña co resto do país e de Europa

O anterior Goberno autonómico do Partido Popular preveu consignar 12 millóns de euros no período 2006-2007 cantidade necesaria para que esta vía de comunicación poida entrar en servizo antes do 2013. Os últimos tres orzamentos do bipartito acumulan unha diminución do compromiso inversor próxima aos 10 millóns de euros, e achegan unha cantidade a todas luces insuficiente. PSOE e BNG están a renunciar, coa súa desidia ao corredor, e isto a pesar de que existe un consenso básico en que esta infraestrutura servirá para poñer fin á grave carencia de modernas estradas e terá capacidade suficiente para impulsar a actividade industrial, empresarial e turística da Marina.

Un dos puntos que presenta un maior atraso, é a denominada "variante de Viveiro". Falamos do corredor ao seu paso por esta localidade mariña. A parouse dos proxectos técnicos e a falta de consignación orzamentaria específica, implica que a posta en servizo desta variante -básica para evitar o paso pola travesía urbana dos vehículos que utilicen o futuro corredor-. E polo que, podemos afirmar, sen temor a equivocarnos que, o bipartito fai da Vía de Alta Capacidade Ferrol-San Cibrao, unha infraestrutura ilusoria. O ACCESO Á VIVENDA, resulta ser tamén unhas das preocupacións básicas dos mariñáns compartida co resto dos galegos. O importantísimo incremento no número de vivendas en construción, non trouxo consigo un aumento correlativo nos investimentos destinados a vivenda protexida e de promoción oficial. Lonxe dixo, o departamento autonómico que dirixe Teresa Táboas nega aos mariñáns a posibilidade de coñecer, a través dos orzamentos para 2008, as previsións de investimentos nos distintos concellos da Marina. Esta circunstancia, sumada á práctica ausencia de novos proxectos de vivenda accesible, e a redución en máis dun 40% das achegas durante os pasados anos, presaxian que a nosa comarca volverá a ser a gran esquecida.

En relación co mundo do mar, de gran transcendencia nunha bisbarra que dispón de portos tan importantes como os pesqueiros de Burela e Celeiro, podemos destacar a importante CAÍDA NOS INVESTIMENTOS do Goberno galego destinados ás confrarías da Marina e, máis en concreto, os cartos destinados a dinamizar o SECTOR DA PESCA DE BAIXURA. Esta redución nos investimentos nos pósitos mariñáns superou o 27% entre 2005 e 2006, e o 36%, se os comparamos coas achegas totais recibidas nos últimos seis anos. Falamos dos peores datos do último sexenio, xa que tan só oito dos catorce proxectos presentados polas Confrarías de Pescadores marinas recibiron a aprobación e, polo tanto, o conseguente financiamento, por parte da Consellería de Pesca. Na Xunta de Galicia negan o financiamento a melloras tan importantes como as destinadas á rexeneración de praias e bancos marisqueiros, pero tamén a outros, "non menos importantes" como son o financiamento das labores de coidado, control, seguimento e vixilancia, ou a formación e asistencia técnicas xestionadas desde os pósitos mariñáns.

A isto debemos engadir a falta de execución dos PLANS DE DESENVOLVEMENTO PESQUEIRO que, no seu día foron aprobados polo anterior Goberno de Galicia, e que incluían unha serie de actuacións e melloras nos portos galegos. Deste xeito obviáronse importantes investimentos en portos como os de Foz e O Vicedo e, mais en concreto, a execución de melloras nas infraestruturas, na comercialización e nos servizos portuarios que, en todo caso, atendían sempre as suxestións efectuadas polas confrarías e ás necesidades específicas de cada localidade.

Xunto ao exposto, non debemos deixar de facer mención á actual CRISE que afecta aos sectores dedicados á captura de BONITO e da PESCADA cuxa actividade non está a ser rendible, arruinando a costeira deste ano. Todo iso como consecuencia dos baixos prezos de cotización que

se están rexistrando e sen que exista unha reacción coordinada, rápida e eficaz por parte dos Gobernos autonómico e central. Así por exemplo o Goberno galego non desenvolveu, nestes anos de xestión bipartita, nin unha sola campaña de promoción para o consumo de bonito ou pescada procedente de barcos galegos e están a tolerar a entrada de pescado foráneo, con moitas menos garantías, un peor etiquetado, -que nalgúns casos non garante a súa trazabilidade, e en todo caso, que supón un elemento de confusión para o consumidor. Pese a todo, o actual goberno nega a existencia desta crise, cego ante a realidade dun sector desamparado do apoio da Xunta nestes últimos momentos. Un desamparo que tamén afecta a flota de altura e gran altura que faena no Gran Sol

En conclusión, os orzamentos para a Xunta de Galicia en 2008, lonxe de poñer fin ao progresivo baleirado de servizos que está a sufrir desde fai tres anos a nosa comarca, supoñen unha diminución do compromiso inversor do bipartito na Marina. A caída nos investimentos reais, con destino determinado e territorializados, é superior ao 15% se o comparamos coa prevista nos orzamentos da presenta anualidade, e ao 37,22% se as comparamos coas últimas contas elaboradas polo último Goberno popular. A Marina, pese a ser unha das comarcas máis puxantes e con maior potencialidade de Galicia, está a ser marxinada polos orzamentos do bipartito que, ademais, son incapaces de resolver os múltiples problemas que afectan aos veciños. PSOE e BNG son incapaces de garantir o nivel de investimentos suficientes para corraxir ou promover importantes actuacións en materia de sanidade, infraestruturas, vías de comunicación, emprego ou servizos sociais. Os mariñáns, en consecuencia, aspiran a máis.

Por todo o anteriormente exposto, o Grupo Municipal que subscribe, considera de interese municipal prioritario que o Pleno da Corporación Municipal

ACORDE:

PRIMEIRO.- Instar á Xunta de Galicia a poñer fin á marxinación e discriminación que están a sufrir os concellos da Marina lucense como consecuencia do esquecemento e da carencia en investimentos que caracterizan aos orzamentos autonómicos para o 2008.

SEGUNDO.- Dar traslado deste acordo ao Presidente da Xunta de Galicia, á Presidenta do Parlamento e aos Grupo Parlamentarios con representación na Cámara autonómica.”

Aberto o debate, polo Sr. Pernas Rodríguez sinalase que visto o contido da moción, reitéranse os argumentos efectuados no debate do punto 8 do orde do día.

Polo Sr. Fernández Bouza reitéranse igualmente os argumentos expostos no debate do punto 8 da orde do día, engadindo que non é certo en absoluto que a actual Xunta de Galicia marxine a Mariña de Lugo, e que esa afirmación en boca dun partido como o Popular é cando menos un escándalo.

Polo Sr. Ben Fernández reitéranse os argumentos expresados no debate do punto 8º da orde do día, engadindo que mírese como se mire, as inversións na Mariña de Lugo previstos nos orzamentos da Xunta para o ano 2008 son infinitamente maiores que os executados polos gobernos autonómicos do Partido Popular en calquera dos mais de 20 anos que gobernou Galicia.

Rematado o debate, o Concello Pleno cos votos favorables dos Sres. Salgueiro Rapa, Balseiro Canoura, González Alvarez, Abad López, Meitin Guerreiro, Pernas Rodríguez, Vázquez Frá, Fernández Basanta, e Casabella Lage, e co voto en contra dos Sres. Ben Fernández e Fernández Bouza , acorda aproba-la moción do epígrafe anteriormente transcrita.

Fora da orde do día da sesión, o Concello Pleno, por unanimidade dos seus membros asistentes á sesión, que representa a maioría absoluta do seu número legal de membros, ó abeiro do disposto no artigo 91.4 do Real Decreto 2568/1986 de 28 de novembro, acordou entrar no debate e votación do seguinte asunto:

11º) EXPEDIENTE DE MODIFICACIÓN DE CRÉDITOS DO ORZAMENTO MUNICIPAL DO EXERCIZO DE 2007, Nº 13-MODIFICADO, POR IMPORTE DE 333.268,44 €. APROBACION INICIAL.ADOPCIÓN DE ACORDO.

Polo Sr. Alcalde manifestase que tendo en conta á vista dos argumentos expresados polos portavoces de tódolos grupos municipais no debate do punto 5º da orde do día da presente sesión, despréndese que a única desconformidade co expediente de modificación de créditos debatido, refírese ó aumento de 541.140,00€ na partida 432.611 destinada a financia-la execución de ampliación da ponte de FEVE, e considerando que as outras actuacións necesitadas de maior consignación son absolutamente razoables e nalgúns casos ineludibles, proponse ó Pleno corporativo a aprobación inicial do expediente de modificación de crédito de referencia, coa modificación derivada da non inclusión do aumento de 541.140,00€ na partida 432.611 destinada a financia-la execución de ampliación da ponte de FEVE, resultando en consecuencia, un expediente de modificación de crédito por importe de 333.268,44 € xa que o resto do expediente mantense nos mesmos termos e cantidades previstos.

Rematado o debate, o Pleno corporativo, por unanimidade dos seus membros asistentes á sesión acorda aproba-la proposta da Alcaldía anteriormente transcrita, e na súa consecuencia aproba-lo expediente de modificación de créditos por importe de 333.268,44 €

ROGOS E PREGUNTAS.

Por Secretaría dáse lectura ó escrito de rogos e preguntas presentado polo portavoz do Grupo Municipal do BNG que a seguir se transcribe integramente:

Dáse igualmente lectura s contestacións do Sr. Alcalde Presidente efectuadas por escrito que igualmente se transcribe a seguir de xeito literal:

Xesús Xosé Fernández Bouza, Portavoz do Grupo Municipal do B.N.G. de Xove presenta os seguintes Rogos e Preguntas para o próximo Pleno Ordinario do mes de Novembro.

ROGOS:

1.- En relación ás respostas que se lle dan os rogos e preguntas que a oposición fórmula nos plenos:

Pedimos que se lean as respostas a continuación de cada pregunta, facilitando a réplica se oubese lugar para que haxa diálogo e debate, e para que non se lea todo seguido e dun xeito que dificulta a comprensión.

PREGUNTAS:

1.- Periodicamente, o clorado da auga potable de Palmeiro é excesivo-. E ben sabido o perxuízo que isto entraña para a saúde, o sistema de clorado non é o más axeitado para garantir un bó tratado das augas, polo que pedirnos que se solucione o problema e polo anterior preguntamos:

O sistema de clorado actual garante un clorado homoxéneo ou pódense mellorar as instalacións da potabilizadora, e si isto e así, porque temos que soportar estas variacións na calidade das augas?

2.- No presuposto do pasado 2004, recollíase en inversións reais, a apertura dunha rúa transversal, de Baamonde illade a Tomás Mariño que aínda a estas alturas do 2007 non se empezou cales son os motivos reais do estancamento desta obra e cando veremos rematada a unión das dúas rúas?

3.- -Pensa o Goberno Local facer algún Banco de terras para acollerse ós programas que a Consellería do Meio Rural ten para recuperar terras produtivas e crear emprego no agro?

4.-. As axudas de estudos concedéronse con moito retraso, cal foi a causa?

5- A escasísima oferta de actividades nos centros sociais, e a total ausencia de programas de reactivación das parroquias, fainos presentar a seguinte cuestión: Por que non fan un programa de actividades sociais, culturais e deportivas nos distintos centros sociais que hai espallados polo concello co obxecto de reactivar as parroquias?

6.- Aínda que de todos e sabido que a nova depuradora foi concedida durante a anterior lexislatura, debido á urxencia polo desastre ecolóxico que supoñen os vertidos ó Rio Rigueira, descoñecemos a causa do retraso no comezo das obras, interesáronse vostedes por este tema, cando se empezan as obras?

7- As novas que se publicaron en diversos xornais, dende o día 7/8/2007 referente á contaminación denunciada unha vez máis polos veciños das inmediacións da factoría de Alcoa, son continuistas e parciais, e denotan desinterés do Sr. Alcalde na defensa dos veciños , algúns parágrafos son realmente desafortunados, e polo que lle pedimos ó Novo goberno que informe e faiga públicas, as medidas que pensa adoptar para reconducir e levar iste problema á unha solución, que remate cos intereses alleos, e de abuso a que están sometidos ós veciños a iste respecto. Preguntamos: A que acordos chegou o Sr. Alcalde, nas reunións que mantuvo con Alcoa a respecto deste tema?

8.- No tocante ó inventario de bens inmobles, tanto rústicos como urbáns, que DESAPARECEU no concello, preguntamos:

a. Por que non se fai unha auditoria (independentemente de que se estea reelaborando o inventario)?

b. Por que a actual corporación do concello non denuncia a desaparición do inventario ante as autoridades pertinentes para que comecen unha investigación policial?

9.- A reparación das marquesinas, e un tema pendente en casi todo o Concello, están a maioría delas nun estado penoso e inservible, ¿ cando se van tomar as medidas necesarias para poñelas novas ou restaurar as que sirvan, para elo?

10.- Chegou o BNG a información de que se estaban facendo obras particulares sobre o Castro que está situado no alto de Esteiro. A este respecto facemos as seguintes preguntas:

a) Ten esta obra permiso?

b) Teñen coñecemento as autoridades con competencias en Patrimonio de que se está realizando esta obra e deron o seu permiso?

e) En caso de que sexa unha obra ilegal, que teñen pensado facer vostedes para evitar a violación do mentado Castro?

11.- Dado o actual abandono dos múltiples castros que se atopan no Concello, preguntámoslle á actual Corporación municipal, teñen pensado levar a cabo a catalogación e poñer en marcha os mecanismos pertinentes, para que as autoridades con competencias na materia restauren e estuden estes castros?

12.- En relación os muiños que hai no Rio Rigueira: a) Estan os muiños catalogados como ben de interese cultural? b) Van facer vostedes algo para a súa restauración, conservación así como habilitación do espazo natural circundante?

13.- O pavillón do Centro de Educación Caselles Rollán, ten unha serie de deficiencias de sobra coñecidas polo plenario. A ausencia de vestiarios, gradas, e o estado do pavimento son algunhas delas. Teñen pensado facer algo para que se habilite este pavillón? E, no caso de que non estea na súa man acometer esta habilitación: por que non levan a cabo os trámites pertinentes para que o faga quen lle corresponda?

CONTESTACIÓNS ÁS PREGUNTAS E ROGOS FORMULADAS POR ESCRITO POLO GRUPO MUNICIPAL DO B.N.G. (REXISTRO DE ENTRADA Nº: 3352 DE 05/11/2007) PARA A SESIÓN ORDINARIA DO PLENO CORPORATIVO DE DATA 12 DE NOVEMBRO DE 2007.

Rogos:

Se no expediente da sesión inclúesen tódolos escritos de rogos e preguntas presentados en tempo e forma polos diferentes grupos municipais e na súa consecuencia tódolos membros da corporación teñen o seu dispor copia de dito escrito ou escritos; non se aprecia que exista ningunha clase de dificultade para compréde-las respostas que a ditos rogos e preguntas se fan pola Alcaldía tamén por escrito.

Preguntas:

1ª.- Pola información recabada do encargado do servizo municipal de augas o clorado da auga de toda a rede municipal de abastecemento de auga potable, incluíndo a de Palmeiro cumpre rigorosamente coa normativa sanitaria de aplicación tal é como se reflicte tanto nas análises preceptivas efectuadas pola Consellería de Sanidade como nas análises que a maiores efectúa o Concello, de feito hai menos de catro meses na sesión plenaria de data 10 de maio de 2007 precisamente repostando á pregunta formulada por escrito polo concelleiro do seu propio partido Sr. Duran Cao se comunicou que o nivel de cloración da auga de palmeiro sempre se mantivo entre o 0'6 e o 0'8 PPM (partículas por millón) sen chegar nunca ó 1 PPM que é o límite máximo fixado pola normativa de calidade de augas para consumo e tamén se contestou que na ETAP de Montevelle donde se clora a auga de Palmeiro se clora igualmente a auga de Xove, Morás, Lago, Portocelo, Sumoas e a zona de Ceranzos – Esteiro.

2ª.- Volveuse a poñer en coñecemento do grupo municipal do BNG que en tanto en conta no se aprobe o Plan Xeral de Ordenación Municipal é legalmente imposible proceder á expropiación dos terrenos necesarios para executar dita rúa.

3ª.- Con independencia de que a xestión do arrendamento voluntario de terras a través do Banco de Terras é unha competencia exclusiva da Xunta que se canliza a través das Oficinas Agrarias Comarcais; desde a Delegación Municipal de Agricultura se esta facilitando a tódolos interesados a información necesaria para facer uso dese servizo.

4ª.- Os integrantes do actual grupo de goberno, tomaron posesión dos seus cargos hai menos de cinco meses , e nese período de tempo tiveron que estudar e revisar tódolos expedientes que xa estaban tramitándose razón pola cal a resolución dalgún deles retrasouse. Mais no caso concreto das axudas ó estudo polas que Vd. pregunta resulta que este ano concedéronse un mes antes que o ano pasado.

5ª.- Desde o Concello xa se iniciaron contactos e efectuáronse reunións tanto cos adxudicatarios da explotación dos Centros Sociais como cos veciños de cada Parroquia ós efectos da elaboración

dun Proxecto de Actividades de carácter, sociocultural, lúdico e deportivo que se desenvolverá en tódolos Centros Sociais ó longo do ano 2008 e que contara coas axeitadas consignacións presupostarias no Orzamento Municipal do exercicio 2008.

6ª.- Según información do Departamento de Obras e Servizos Hidráulicos da Consellería de Medio Ambiente a construción da nova EDAR de Regosanguento adxudicouse o pasado 18 de outubro á UTE integrada polas empresas Puentes, Calzadas e Infraestructuras S. A. e Aguas, Residuos e Medioambiente S.A..

7ª.- Na reunión mantida coa dirección de ALCOA por parte da empresa garantizouse a continuidade da política de redución da contaminación medioambiental, anque na actualidade xa está dentro dos parámetros esixidos pola lexislación nacional e comunitaria.

O control da actividade de ALCOA e do depósito de lodos desde o punto de vista dos efectos medioambientais será no futuro inmediato moito mais efectivo e riguroso toda vez que a tramitación a través da Consellería da Medio Ambiente da Autorización Medioambiental Integrada tanto do complexo industrial como do depósito de lodos esta a piques de rematar.

De tódolos xeitos o Concello será apoiando ós veciños afectados facéndose cargo do abono dos gastos ocasionados pola realización de análises periódicos sobre o grao de contaminación do entorno das instalacións industriais.

8ª.- Este grupo de goberno tal e como xa manifestou na última sesión plenaria en resposta a unha pregunta idéntica do anterior portavoz do BNG tamén considera grave a perda ou extravío do Inventario non obstante considera unha ocorrencia fora de lugar que o actual portavoz do BNG que na súa condición de concelleiro na lexislatura anterior coñecía a perda ou extravío do Inventario polo menos desde hai 2 anos, veña agora pedindo unha investigación policial.

Doutra banda o grupo de goberno considera que a mellor auditoría que se pode facer para determina-la situación patrimonial do Concello é precisamente a elaboración dun Inventario rigoroso que se someterá ó coñecemento non so da Corporación senón que tamén se someterá ó coñecemento de tódolos veciños antes de ser sometido á aprobación do pleno corporativo.

9ª.- Sen prexuízo das axudas que se solicitarán a outras administracións , Xunta e Deputación, este Grupo de Goberno ten a intención de dotar unha partida presupostaria específica no Orzamento de 2008 para proceder a renovar ou no seu caso reparar tódalas marquesinas ubicadas no Concello e nos lugares que sexa necesario poñer novas marquesinas.

10ª.- É de supoñer que esta pregunta refírese ás Dilixencias Previas incoadas pola Delegación Provincial da Consellería de Cultura respecto da construción dunha vivenda unifamiliar na Parcela 112 do Polígono 15 en Ceranzos.

A este respecto ponse en coñecemento do Pleno Corporativo que con data 13 de xullo de 2007 remitiuse á Delegación Provincial da Consellería de Cultura o Informe emitido con data 12 de xullo de 2007 que obra no expediente da presente sesión e na súa consecuencia está o dispor de tódolos membros da Corporación.

o citado Informe (do que se facilita copia ós portavoces de tódolos grupos) acredítanse as seguintes cuestións:

Que con data 21/09/2005 concedeuse licenza municipal a D, Carlos Otero Uz para a construción dunha vivenda unifamiliar na Parcela 112 do Polígono 15 en Ceranzos de acordo co proxecto técnico básico e de execución redactado polo Arquitecto D. Santiago Meitin Míguez, e do Informe favorable emitido polo Arquitecto Técnico Municipal con data 19/09/2005.

Dita edificación ubicase en terrenos clasificados polo planeamento urbanístico municipal vixente como SOLO NON URBANIZABLE DE NUCLEO RURAL (Núcleo de Ceranzos)

Dita edificación atopase fora da Zona de Protección do Castro de Ceranzos delimitada polas vixentes Normas Subsidiarias de Planeamento Municipal (Ben de Interés Cultural incluído co número 34 no Catálogo de Bens de Interés Cultural das vixentes Normas Subsidiarias de Planeamento Municipal).

A medición a que se refire as Dilixencias Previas incoadas resulta imposible de realizar toda vez que, tal e como se reflicte no informe, na actualidade e desde moitos anos a teor das declaracións de veciños da zona non existen vestixios que acrediten non xa a ubicación do Castro de Ceranzos xenon a súa existencia mesma.

11ª.- A lexislación urbanística e de protección do patrimonio obriga a que tódolos instrumentos de planeamento urbanístico de carácter xeral como as vixentes Normas Subsidiarias e por suposto o futuro Plan Xeral contén dunha banda cun Catálogo de Bens de Interés Cultural e doutra banda cunha ordenanza específica de protección de ditos bens.

Son precisamente esas determinacións de obrigado cumprimento as que constitúen o obxecto do informe sectorial preceptivo que a Consellería de Cultura, concretamente a Dirección Xeral de Patrimonio, ten que emitir e incorporarse ó documento urbanístico.

12ª.- Precisamente na Orde do Día da presente sesión plenaria inclúese un expediente de modificación de créditos que, entre outros obxectivos, pretende dotar de consignación presupostaria a execución da obra da Ruta dos Muiños que se financiará con fondos municipais e con fondos do Plan PRODER e que se complementará co acondicionamento e creación dun area recreativa na zona de Policía do Río Rigueira.

13ª.- Na entrevista mantida co Delegado da Consellería de Educación tratouse, entre outros asuntos, do tema das notorias deficiencias do Pavillón do CEIP Caselles Rollán. Posteriormente técnicos da Delegación desplazáronse a Xove co obxecto de elaborar un Proxecto de Acondicionamento e mellora de dito Pavillón que recollerá a maiores o peche perimetral de dita instalación.

E sen mais asuntos que tratar, sendo as vinte e unha horas e trinta minutos, levantase a sesión, estendéndose a acta presente, de todo o que como Secretario, dou fe.

O ALCALDE,

O SECRETARIO,

Asdo: José Demetrio Salgueiro Rapa

Asdo: Luís María Fernández del Olmo